

contingeret quoquomodo, aliquid a prefato domino Franc(orum) rege petere possimus pro restauro eorundem, quem dominum regem volumus pro huiusmodi restauro nobis in aliquo non teneri. Et promisit nobis dictus dominus rex, quod si in huiusmodi guerris contingeret aliquem vel aliquos de predictis nostris galeatis per inimicos capi et detineri, quod in liberacione et redempcione ipsorum se habebit et faciet, sicut faceret, si de suis propriis aliquis vel aliqui essent capti. Et nos eciam volumus et consentimus, quod si per nos seu gentes nostras in huiusmodi guerris aliqui de inimicis caperentur et detinerentur, quod idem dominus rex de eorum liberacione possit ordinare, sicut sibi placuerit et viderit expedire. Promittimus eciam et ad hoc nos teneri recognoscimus, quod viventibus domino Philippo rege Franc(orum) prefato, eius liberis et eorum quolibet seu eciam aliquo superstite eorundem non erimus nec esse poterimus per nos vel per alios quosunque, publice vel occulte, aliquo tempore in futurum contra ipsos seu eorum alterum seu regnum Francie aliquo facto, genere, insultu seu actu nocivo vel al(iter), amore, odio, favore aut alia causa vel occasione quacunque. Et pro premissis omnibus et singulis a nobis promissis tenendis et fideliter adimplendis nos et bona nostra prefato domino regi et eius liberis et cuilibet eorum per presentes efficaciter obligamus et volumus remanere perpetuo efficaciter obligati et nichilominus premissa omnia et singula per nos ut premittitur promissa ad sancta Dei ewangelia^a per nos corporaliter tacta iuravimus tenere, adimplere et inviolabiliter observare. Ad quorum omnium et singulorum maiorem roboris firmitatem illustrem dominum Iohannem regem Boemie et comitem Lucemburgensem, socerum nostrum carissimum, erga prefatum dominum regem et eius liberos et quemlibet eorum fideiussorem nostrum constituimus per presentes pro omnibus et singulis supradictis integraliter et firmiter observandis. Et nos Iohannes Dei gracia rex Boemie et comes Lucemburgensis prefatus ad dicti domini Henrici ducis instanciam nos erga prefatum dominum regem et eius liberos et quemlibet ipsorum fideiussorem constituimus ad observanciam omnium et singulorum presentibus litteris contentorum. In quorum omnium testimonium et munimen nos, rex et dux predicti, sigilla nostra duximus presentibus apponenda.

a) 'euuangelia' Or.